

Na temelju člana 95. Zakona o organizaciji organa uprave u Federaciji Bosne i Hercegovine («Službene novine Federacije BiH», broj: 35/05), ministrica pravosuđa i uprave Tuzlanskog kantona Vladi Tuzlanskog kantona, podnosi

IZVJEŠTAJ O RADU

MINISTARSTVA PRAVOSUĐA I UPRAVE TUZLANSKOG KANTONA ZA PERIOD 01.01. - 31.12.2010. GODINE

I - UNUTARNJE USTROJSTVO I DJELOKRUG RADA

Ministarstvo pravosuđa i uprave Tuzlanskog kantona (u daljem tekstu: Ministarstvo) je ustrojeno na temelju Zakona o ministarstvima i drugim organima uprave Tuzlanskog kantona («Službene novine TK», broj: 17/00, 3/01, 12/03, 10/05 i 3/08), kao kantonalni organ državne službe, te su ujedno tim Zakonom, kao i drugim pozitivnim zakonima i provedbenim propisima iz oblasti pravosuđa i državne i opće uprave, utvrđene nadležnosti i definirani poslovi koji se izvršavaju radom ovog organa.

Pravilnikom o unutrašnjoj organizaciji Ministarstva je utvrđeno da se svi poslovi iz nadležnosti Ministarstva, u zavisnosti od njihove prirode, srodnosti i povezanosti, obavljaju u dvije osnovne organizacione jedinice i to u:

- Odjeljenju za pravosuđe i upravu i
- Odjeljenju pravnih, finansijsko-računovodstvenih i općih poslova.

Sukladno tome je definiran i djelokrug tih organizacionih jedinica, te je shodno odredbama važećeg Zakona o državnoj službi u Federaciji Bosne i Hercegovine i odgovarajućih provedbenih propisa, utvrđeno da istim rukovode pomoćnici ministra, tako da zajedno sa sekretarom Ministarstva, u ovom organu postoje ukupno tri rukovodeća državna službenika.

Pored toga, u Ministarstvu je Pravilnikom o unutrašnjoj organizaciji Ministarstva sistematizirano još 16 radnih mjesta državnih službenika i namještenika i to: četiri državna službenika i dvanaest namještenika.

Pravilnikom o unutrašnjoj organizaciji Ministarstva je sistematizirano ukupno 19 radnih mjesta, tako da su pored navedena tri rukovodeća državna službenika, predviđena još četiri državna službenika i dvanaest namještenika, od čega je popunjeno 17 radnih mjesta, a nepopunjeno radno mjesto stručnog savjetnika za normativno-pravne i višeg referenta za kontrolu i unos obrazaca u pomoćnu knjigu.

II PLANIRANI I OSTVARENI NORMATIVNO-PRAVNI POSLOVI

A) PLANIRANO

Prema Programu rada Skupštine Tuzlanskog kantona za 2010. godinu («Službene novine Tuzlanskog kantona», broj 16/09), u dijelu koji se odnosi na normativnu djelatnost, Ministarstvo je zaduženo da kao obrađivač pripremi slijedeće zakone:

1. Zakon o izmjenama i dopunama Zakona o izvršenju sankcija

Obrađivač: Ministarstvo pravosuđa i uprave

Rok: februar 2010. godine

2. Zakon o pravima i dužnostima izabranih zvaničnika, nosilaca izvršnih funkcija i savjetnika u organima vlasti Tuzlanskog kantona

Obrađivač: Administrativna komisija Skupštine Tuzlanskog kantona u koordinaciji sa Ministarstvom pravosuđa i uprave

Rok: februar 2010. godine

3. Zakon o izmjenama i dopunama Zakona o pečatu Tuzlanskog kantona

Obrađivač: Ministarstvo pravosuđa i uprave

Rok: juni 2010. godine

B) OSTVARENO

1. Zakon o izmjenama i dopunama Zakona o izvršenju sankcija

Nakon ranijeg noveliranja kantonalnog Zakona o izvršenju sankcija iz 2007. godine, bilo je planirano da se u 2009. godini ponovo izvrše izmjene tog Zakona, prvenstveno radi stvaranja pravnog osnova za donošenje provedbenih propisa u cilju afirmacije alternativne sankcije-rad za opće dobro na slobodi.

Imajući u vidu sve veću prenatrpanost ustanova za izvršenje kazne zatvora, velike novčane izdatke za izdržavanje ove kazne i visoku stopu kriminalnog povrata, budući da programi tretmana osuđenika nisu dovoljno izdiferencirani i individualizirani prema karakteristikama osuđenika, Strategijom za reformu sektora pravde u Bosni i Hercegovini, koju je usvojilo Vijeće ministara Bosne i Hercegovine i entitetske Vlade, u dijelu koji se odnosi na izvršenje kaznenih sankcija, kao jedna od mjera za rasterećenje postojećih zatvorskih kapaciteta u Federaciji BiH, predviđena je implementacija već utvrđenih, ali i uvođenje drugih vidova alternativnih kazni u kazneno zakonodavstvo u Bosni i Hercegovini.

Alternativna kaznena sankcija predstavlja novinu u kaznenom zakonodavstvu Bosne i Hercegovine i u naš pravni sistem uvedena je 2003. godine, usvajanjem Kaznenog zakona Federacije Bosne i Hercegovine („Službene novine Federacije Bosne i Hercegovine, br.36/03, 37/03, 21/04, 69/04 i 18/05), kojim je i utvrđena obaveza kantona u pogledu raspoređivanja osuđenih na rad za opće dobro na slobodi u smislu vrste i radnog mjesta.

Kako je u tom pogledu neophodno regulirati pitanja kao što su vrste poslova na koje se osuđeni mogu rasporediti i koji odgovaraju cilju ovog rada, postupak i uvjete za raspoređivanje osuđenika nakon dostavljanja pravosnažne presude, neophodno je bilo utvrditi pravni osnov za donošenje provedbenih propisa, što je i predviđeno ovim Zakonom.

Stoga je Ministarstvo pripremilo nacrt Zakona o izmjenama i dopunama Zakona o izvršenju sankcija, koji je Vlada razmatrala i utvrdila na sjednici održanoj 13.11.2009. godine, nakon čega je isti upućen u dalju skupštinsku proceduru.

Skupština je na sjednici održanoj 30.11.2009. godine prihvatila nacrt ovog Zakona, ali je ujedno prihvatila i prijedlog Programa javne rasprave o istom, u trajanju od 40 dana, za čije je provođenje zaduženo Ministarstvo.

Kako zbog dužine trajanja i brojnih učesnika javne rasprave, kao i samog značaja i velikog interesiranja za reguliranje pojedinih pitanja, ove aktivnosti nisu mogle biti okončane do kraja 2009. godine, Programom rada Skupštine, Vlade i Ministarstva za 2010. godinu, bile su planirane dalje aktivnosti na izradi prijedloga, koje su kada je riječ o obavezama ovog Ministarstva kao obrađivača, blagovremeno i okončane, što je rezultiralo konačnim donošenjem tog Zakona na sjednici Skupštine Tuzlanskog kantona održanoj 30.3.2010. godine, a objavljen je u «Službenim novinama TK», broj 4/10.

2. Zakon o pravima i dužnostima izabranih zvaničnika, nosilaca izvršnih funkcija i savjetnika u organima vlasti Tuzlanskog kantona

Kao što je i navedeno, Programom rada Skupštine Kantona je za pripremu ovog Zakona bila zadužena Administrativna komisija Skupštine Tuzlanskog kantona, obzirom da se tim Zakonom reguliraju pitanja koja izlaze izvan okvira funkcionalnih nadležnosti ovog Ministarstva, ali je isto aktivno sudjelovalo u pripremi tog Zakona u nastojanju realiziranja svog programskog zadatka u ovom pogledu.

Imajući u vidu pitanja koja po Poslovniku o radu Skupštine Kantona spadaju u nadležnost Administrativne komisije Skupštine, a postupajući po podnesenoj poslaničkoj inicijativi, Ministarstvo je krajem 2009. godine pripremio i toj Komisiji uputilo nacrt Zakona o pravima izabranih zvaničnika, nosilaca izvršnih funkcija i savjetnika u organima vlasti Tuzlanskog kantona.

Te su aktivnosti nastavljene i u 2010. godini. Međutim, nisu u konačnom rezultirale donošenjem kantonalnog Zakona, obzirom da je u međuvremenu donesen **Zakon o plaćama i naknadama u organima vlasti Federacije Bosne i Hercegovine («Službene novine F BiH», broj 45/10)**, nakon čega je uslijedilo donošenje Odluke o izmjenama i dopunama Odluke o utvrđivanju plaća i naknada funkcionera koje bira ili imenuje Skupština Tuzlanskog kantona i naknada za vršenje funkcije poslanicima u Skupštini Tuzlanskog kantona («Službene novine TK», broj 12/10).

3. Zakon o izmjenama i dopunama Zakona o pečatu Tuzlanskog kantona

Kako je Zakon o pečatu Tuzlanskog kantona, koji je donesen 1999. godine, samo jednom pretrpio izmjene i dopune i to u 2004. godini, ukazala se potreba za ponovnim izmjenama tog Zakona, u manjem obimu, radi usaglašavanja sa promjenama koje su nastale reformom javne uprave i prekršajnog sistema, kao i usaglašavanja sa Zakonom o prekršajima Federacije Bosne i Hercegovine („Službene novine Federacije BiH“, broj 31/06).

Stoga je početkom maja 2010. godine pripremljen prijedlog ovog Zakona, koji je upućen u dalju proceduru.

Ujedno, iz razloga što se ne radi o složenom i obimnom zakonu, predloženo je da taj prijedlog Zakona bude razmatran po skraćenom postupku, što je i prihvaćeno, te je Skupština isti donijela prije programom utvrđenog roka, na sjednici održanoj 31.5.2010. godine, tako da je taj Zakon i objavljen u «Službenim novinama TK», broj 8/10.

C) NEPLANIRANO

1. Odluka izmjeni i dopuni Odluke o utvrđivanju uslova i kriterija za imenovanja u regulirane organe

U julu 2010. godine je pripremljen i Vladi Kantona upućen prijedlog **Odluke izmjeni i dopuni Odluke o utvrđivanju uslova i kriterija za imenovanja u regulirane organe**

2. Zakon o preuzimanju Zakona o državnoj službi u Federaciji Bosne i Hercegovine

U avgustu 2010. godine je pripremljen prijedlog **Zakona o preuzimanju Zakona o državnoj službi u Federaciji Bosne i Hercegovine**, što je bilo neophodno za prevazilaženje pravne praznine do koje je došlo objavljivanjem Presude Ustavnog suda Federacije Bosne i Hercegovine, broj: 27/09 od 20.4.2010. godine. Tom Presudom je utvrđeno da član 1. stav 1. Zakona o državnoj službi u Federaciji Bosne i Hercegovine ("Službene novine F BiH", broj 29/03, 23/04, 39/04, 54/04, 67/05 i 8/06) u dijelu koji glasi "kantonu, gradu i općini" nije u saglasnosti sa Ustavom Federacije Bosne i Hercegovine.

U konkretnom slučaju Ustavni sud Federacije BiH nije odredio način na koji treba izmijeniti predmetni federalni Zakon, niti je odredio neke prelazne mjere, te je shodno odredbi člana IV C.12. b) Ustava Federacije Bosne i Hercegovine, navedena Presuda bila konačna i obavezujuća, a ista je stupila na snagu danom objavljivanja u "Službenim novinama Federacije BiH", broj 34/10, tj. 9.6.2010. godine.

Kako je tog dana prestala primjena federalnog zakona, kao i provedbenih propisa donesenih na osnovu tog Zakona, kojima je bio uređen radno-pravni status državnih službenika u kantonalnim organima, preostalo je da se na njih primjenjuju opći propisi o radu, koji nisu adekvatni i primjenljivi za ove kategorije zaposlenika, zbog specifičnosti njihovog statusa i raijeg normativnog tretmana, pa je stoga bilo neophodno da se pripremi prijedlog Zakona o preuzimanju Zakona o državnoj službi u Federaciji Bosne i Hercegovine i da isti bude donesen po hitnom postupku.

3. Zakon o plaćama i drugim naknadama u organima vlasti Tuzlanskog kantona

Krajem avgusta 2010. godine pripremljena je I radna verzija **Zakona o plaćama i drugim organima vlasti Tuzlanskog kantona**, koja je zatim dorađivana, u čijoj su izradi uposlenici Ministarstva uzeli aktivno učešće.

III – OSTALE AKTIVNOSTI U IZVRŠAVANJU POSLOVA IZ NADLEŽNOSTI MINISTARSTVA

A) ODJELJENJE ZA PRAVOSUĐE I UPRAVU

1 - OBLAST PRAVOSUDA

Pored navedenih normativnih aktivnosti, u okviru djelokruga Odjeljenja za pravosuđe i upravu su poduzete i brojne programske, kao i vanprogramske aktivnosti u cilju izvršavanja ostalih poslova, od kojih su najznačajnije bile usmjerene ka stvaranju institucionalnog okvira za preveniranje i sankcioniranje maloljetničkog prestupništva i ostvarivanje prava na slobodan pristup sudu kroz pružanje besplatne pravne pomoći građanima slabog imovnog stanja.

Zbog složenosti i kompleksnosti ove problematike, u startu je opredijeljen multidisciplinarni i multiresorni pristup, pa je uz sudjelovanje drugih organa i organizacija, te sagledavanje dostignuća i iskustava iz prakse, kako u našoj zemlji tako i šire, ovo Ministarstvo bilo nosilac i ujedno koordinator brojnih aktivnosti.

a) Stvaranje pretpostavki za otpočinjanje sa radom Disciplinskog centra za maloljetnike

Imajući u vidu da je Skupština ovog Kantona, prilikom razmatranja i usvajanja Informacije o maloljetničkom prestupništvu u Tuzlanskom kantonu, kao i Operativnog plana realizacije mjera prevencije maloljetničkog prestupništva, pored ostalog, opredijelila stav da se urgentno pristupi osnivanju Disciplinskog centra za maloljetnike, nakon donošenja Zakona o osnivanju tog Centra, kao javne ustanove, od maja prošle godine su uslijedile brojne aktivnosti na stvaranju pretpostavki za otpočinjanje sa radom te ustanove, od kojih je ovo Ministarstvo bilo posebno angažovano na:

- obezbjeđivanju prostora namijenjenog za smještaj Disciplinskog centra, te je nakon donošenja Odluke, kojom je Općinsko vijeće Općine Tuzla za ovu svrhu Kantonu dodijelilo na korištenje određeni prostor, pripremljen i zaključen ugovor o uslovima i načinu korištenja tog prostora, a zatim je formirana zajednička komisija, izvršena primopredaja prostora, te su u skladu sa budžetskim mogućnostima osigurana potrebna finansijska sredstva za prvu fazu sanacije, adaptacije i opremanja istog, čime je veći dio tog prostora doveden u sasvim zadovoljavajuće stanje,
- upućivanju inicijative Vladi Kantona za imenovanje privremenog upravnog odbora i vršioca direktora te ustanove, a zatim i inicijative za provođenje redovne procedure u cilju konačnih imenovanja na te pozicije sukladno važećim propisima,
- izradi Pravila i drugih općih akata te ustanove, te davanju saglasnosti, odnosno mišljenja o njihovoj usaglašenosti sa zakonima i drugim propisima,
- poduzimanju određenih radnji u cilju registracije Disciplinskog centra u registru pravnih subjekata kod Općinskog suda u Tuzli, kao nadležnog suda, te pribavljanje potrebne dokumentacije u tu svrhu, uključujući i izradu prijedloga Odluke o osnivačkom pologu na privremeni račun deponovanih novčanih uloga kojim se utvrđuje visina naplaćenog kapitala u novcu za osnivanje te javne ustanove.

Sve navedeno, zajedno sa ostalim što je poduzimalo ovo Ministarstvo, uz punu podršku Vlade i drugog resornog kantonalnog ministarstava, kao i privremenog organa upravljanja, odnosno rukovođenja Disciplinskog centra, u ovom početnom periodu, rezultiralo je ostvarenjem potrebnih materijalnih pretpostavki za obavljanje djelatnosti za koje je i osnovana ova ustanova.

Disciplinski centar za maloljetnike je otpočeo sa radom 16.04.2010. godine.

b) Stvaranje pretpostavki za otpočinjanje sa radom Kantonalnog zavoda za pružanje pravne pomoći

Posljednjim izmjenama i dopunama Zakona o ministarstvima i drugim organima uprave Tuzlanskog kantona, iz 2008. godine i Zakonom o pružanju pravne pomoći, donesenim u oktobru 2008. godine, stvorene su normativno-pravne pretpostavke za osnivanje i početak rada Kantonalnog zavoda za pružanje pravne pomoći, kao samostalne upravne organizacije.

Stoga je, nakon okončane redovne zakonske procedure i izvršenog imenovanja od strane Vlade, te stupanja na dužnost direktorice tog Zavoda, na samom početku drugog polugodišta prošle godine, pokrenuto i vođeno niz aktivnosti u cilju stvaranja svih ostalih pretpostavki za obavljanje poslova za koje je taj Zavod i osnovan.

Na samom početku je bilo neophodno obaviti sve formalne radnje u cilju odobravanja, izrade i predaje na upotrebu pečata Zavoda odgovarajućeg sadržaja, kako bi se omogućilo dalje

prijavljivanje i registracija te upravne organizacije kod nadležnih organa, a zatim su uslijedile konsultacije za izradu i davanje mišljenja o pripremljenom Pravilniku o unutrašnjoj organizaciji i, prema ukazanoj potrebi, drugim općim aktima Zavoda.

Paralelno s tim su iznalažene mogućnosti adekvatnog smještaja i opremanja prostora, kao i osiguranja potrebnih sredstava za finansiranje rada tog Zavoda, kao nove budžetske potrošačke jedinice.

U tom pogledu je značajno napomenuti da je većim dijelom realiziran Memorandum o razumijevanju, zaključen između Ministarstva i Projekta razvoja sektora pravosuđa (JDSP) - USAID-a i to u dijelu kojim se JDSP obavezao da će osigurati omote za spise i otvorene police, softver za upravljanje predmetima i instaliranje softvera pri uspostavljanju Zavoda.

Kako je pomenuti Projekat okončan prije prijema pomoćnika direktora, koji su ujedno i pravni zastupnici, odnosno stručnog savjetnika, nije bilo moguće realizirati obuku zaposlenika Zavoda, koja je takođe bila planirana i dogovorena, pa su sagledane mogućnosti i pronađene druge odgovarajuće mogućnosti.

Kantonalni zavod za pružanje pravne pomoći je otpočeo rad sa strankama u punom obimu 25.01.2010. godine.

c) Zavod za sudsku medicinu i medicinsku kriminalistiku

Realizirajući Zaključak Vlade Kantona, koji je donesen na sjednici Kolegija Vlade održane 17.2..2009. godine, ovo Ministarstvo je zajedno sa kantonalnim ministarstvima zdravstva i unutrašnjih poslova, kao i Uredom za zakonodavstvo Vlade TK, bilo angažovano na elaboriranju i sagledavanju svih pravnih, finansijskih i drugih mogućnosti za osnivanje Zavoda za sudsku medicinu i medicinsku kriminalistiku TK, kao javne ustanove. U sklopu tih aktivnosti su prikupljane informacije o postojećim organizacionim oblicima, načinu formiranja i dosadašnjim iskustvima institucija za ovu namjenu u Bosni i Hercegovini i susjednim zemljama, održano je niz sastanaka sa specijalistima sudske medicine, predstavnicima. Međunarodne komisije za nestale osobe (ICMP), načelnikom Općine Tuzla i njegovim suradnicima. Te aktivnosti su rezultirale iskristalisanim stavovima radne grupe o mogućim rješenjima, što u konačnom treba da opredijeli Vlada i Skupština kantona.

d) Obavljanje ostalih poslova u oblasti pravosuđa

Pored navedenog, tokom cijele godine su vođene aktivnosti u cilju osiguranja, prostornih, kadrovskih i materijalno-tehničkih uvjeta za nesmetano funkcioniranje pravosudnih organa na području Tuzlanskog kantona.

U potpunosti je ostvarena suradnja sa predsjednicima Kantonalnog i svih pet općinskih sudova, kao i glavnim kantonalnim tužiteljem, te su uspješno rješavana sva pitanja koja su se pojavila kao problematična u radu ovih organa. Kontinuirano je praćeno obavljanje poslova sudske uprave, te su poduzimane potrebne mjere i davani prijedlozi za rješavanje svih problema.

Periodično su prikupljeni statistički podaci o radu sudova, te je uspostavljena baza podataka značajnih za praćenje rada i funkcioniranje sudova, što predstavlja i osnovno polazište za opredjeljivanje aktivnosti u cilju osiguranja materijalnih preduvjeta za rad pravosudnih organa.

Ostvarena je puna saradnja sa Visokim sudskim i tužiteljskim vijećem BiH, te je isto redovno izvještavano o poduzetim aktivnostima, kao i propisima, koje je u okviru svojih nadležnosti pripremalo Ministarstvo, a od značaja su za rad pravosudnih organa.

Pored navedenog, intezivirana je suradnja sa Federalnim ministarstvom pravde, ali i sa resornim ministarstvima drugih kantona, te su razmijenjena iskustva stečena u ostvarivanju funkcije ovih ministarstava i analizirani rezultati u provođenju propisa iz oblasti pravosuđa.

Tokom izvještajnog perioda, Ministarstvu su upućivane predstavke na rad sudova, zbog dužine trajanja sudskih postupaka, postupanja sudija, nezadovoljstva odlukama suda ili neizvršavanjem istih. Polazeći od odredaba Zakona o sudovima u Federaciji BiH („Službene novine Federacije BiH“, br. 38/05 i 22/06), kojim je jasno regulirano da ministarstva pravde nisu nadležna za postupanje po pritužbama na rad sudija, iste su prosljeđivane Uredu disciplinskog tužitelja pri Visokom sudskom i tužiteljskom vijeću Bosne i Hercegovine.

U ostalim slučajevima, kada Ministarstvo nije bilo nadležno za postupanje po upućenim predstavkama, građanima su davani pravni savjeti u pogledu daljih mogućnosti ostvarivanja njihovih prava, a njihovi podnesci su upućivani nadležnim organima.

Sukladno zakonskim ovlaštenjima u svim sudovima je kontinuirano praćeno obavljanje poslova iz domena sudske uprave, u cilju unapređivanja organizacije, načina rada i poslovanja tih organa. Posebno je analizirana adekvatnost sistematiziranih radnih mjesta i njihova popunjenost, radi postizanja bolje efikasnosti i ažurnosti u radu sudova, te su po potrebi poduzimane aktivnosti za osiguravanje finansijskih sredstava i stvaranje drugih uvjeta za angažovanje dodatnih kadrova.

U vezi sa obavljanjem notarske službe na području Tuzlanskog kantona, značajno je istaći da je nakon provedenog drugog konkursa, ostalo upražnjeno 5 notarskih mjesta, od ukupno 26 koliko ih je utvrđeno Odlukom Vlade Tuzlanskog kantona i to mjesta notara sa službenim sjedištem u općinama Čelić, Sapna, Teočak, Doboj Istok i Kladanj. Stoga je krajem prošle godine, Ministarstvo po treći put objavilo konkurs za izbor preostalih pet notara, ali kako se niko nije prijavio, te pozicije su ostale i dalje upražnjene.

Nakon dostavljanja formulara u propisanom roku od strane Ministarstva, od notara su pribavljeni godišnji poslovni izvještaji, koje su dužni dostavljati Notarskoj komori Federacije BiH, Federalnom ministarstvu pravde i ovom Ministarstvu. Kako se ti izvještaji, shodno odredbama Pravilnika o radu notara („Službene novine Federacije BiH“, broj: 13/09), sačinjavaju na osnovu podataka iz poslovnih knjiga, spisa i na drugi način, isti će poslužiti kao polazište prilikom vršenja nadzora nad radom notara od strane imenovanih kontrolora.

Vrijedno i značajno je napomenuti da se Ministarstvo pravosuđa i uprave Tuzlanskog kantona aktivno uključilo u iznalaženje načina rješavanja predmeta u Zemljišno-knjižnom uredu Općinskog suda Tuzla, koji je u tom segmentu bio jedan od sudova sa najvećim brojem neriješenih predmeta. U suradnji sa Federalnim ministarstvom pravde, po programu Svjetske banke, te Općinskog suda Tuzla, uz angažman dodatnog broja volontera taj proces je okončan.

Važno je napomenuti da je na dan **1.1.2010. godine** u Zemljišno-knjižnom uredu Tuzla bilo **13681** neriješenih predmeta, da je u izvještajnom periodu zaprimljeno novih **4856** predmeta, što je ukupno bilo **18537** neriješenih predmeta.

Na kraju izvještajnog perioda riješeno je **18256** predmeta, ostalo je neriješenih **281** predmet. Dakle, u cijelosti je postignuta ažurnost u rješavanju predmeta u Zemljišno-knjižnom uredu.

U cilju omogućavanja praktičnog upoznavanja studenata sa radom organa državne službe, a na osnovu tačke III stav 1 Protokola o dugoročnoj suradnji u edukaciji studenata Pravnog fakulteta Univerziteta u Tuzli, potpisanog dana 2.11.2007. godine, i u ovom

izvještajnom periodu, dakle u 2010. godini, edukaciju u Ministarstvu pravosuđa i uprave i pravosudnim institucijama Tuzlanskog kantona je prošao određeni broj studenata. Po mišljenju studenata, te predstavnika Pravnog fakulteta aktivnosti su ocijenjene veoma uspješnim i izuzetno korisnim i predložena je i daljnja suradnja i proširivanje suradnje na tom planu.

2 - IZVRŠAVANJE POSLOVA UPRAVNOG RJEŠAVANJA

a) Tokom izvještajnog perioda, vođen je upravni postupak i rješavano o upravnim stvarima iz nadležnosti Ministarstva i to po zahtjevima za upis u Registar udruženja i evidentiranje promjena upisanih podataka u tom Registru, za odobravanje izrade pečata, te za odobravanje polaganja stručnog ispita i oslobađanje od obaveze polaganja tog ispita.

U izvještajnom periodu u radu je bilo ukupno 271 zahtjeva za upis u Registar udruženja koji vodi ovo Ministarstvo, od čega je 16 predmeta preneseno iz ranijeg izvještajnog perioda, a tokom 2010. godine zaprimljeno je 131 predmet za registraciju novoosnovanih udruženja i 140 predmeta se odnosilo na upis promjena.

Po svim zahtjevima koji su bili uredni i uz koje je dostavljena sva potrebna dokumentacija, proveden je upravni postupak, te je u zakonom propisanom roku riješeno svih 271 predmeta.

Kao ni prethodnih godina, ni tokom 2010. godine nije bilo značajnijeg odstupanja u broju podnesenih zahtjeva za upis u Registar. Kontinuirano se ažurira evidencija registriranih udruženja koja djeluju na području Tuzlanskog kantona, razvrstanih po oblastima djelovanja, a koja je od značaja za vršenje nadzora nad njihovim radom, imajući u vidu da je Zakonom o udruženjima i fondacijama („Službene novine Federacije BiH“, broj 45/02) regulirano da nadzor vrši organ uprave iz odgovarajuće upravne oblasti.

Osim toga, postupajući po zahtjevima za izdavanje uvjerenja o činjenicama o kojima se vodi službena evidencija, u izvještajnom periodu izdato je i 100 izvoda iz Registra udruženja i 93 drugih informacija sa kojima raspolaže ovo Ministarstvo.

Rješavano je i po zahtjevima za odobravanje izrade pečata organa i ustanova, koje, sukladno Zakonu o pečatu Tuzlanskog kantona („Službene novine Tuzlanskog kantona“, broj.4/99, 7/99 i 7/04), imaju pravo na pečat Tuzlanskog kantona. Tokom 2010. godine, podnesena su svega dva zahtjeva za uništavanje pečata, i jedan zahtjev za izradu pečata, te su svi zahtjevi riješeni u zakonom propisanom roku. Kao i u prethodnom izvještajnom periodu, ni tokom 2010.godine nije bilo značajnijeg povećanja ovih zahtjeva. Ovo je sasvim razumljivo, budući da su skoro svi organi i institucije koje po zakonu imaju pravo na pečat Tuzlanskog kantona, već ranije pribavili iste, a nisu ni vršene izmjene pomenutog Zakona, koje bi eventualno nalagale obavezu izmjene pečata koje organi koriste u svom radu.

Tokom 2010. godine, rješavano je i po zahtjevima za odobravanje polaganja stručnog ispita, i odobravanje polaganja popravnog ispita. Pozitivno je riješeno 98 zahtjeva za polaganje stručnog upravnog ispita. U izvještajnom periodu se povećao broj podnesenih zahtjeva, jer je u 2010. godini došlo do implementacije odredaba Zakona o zaštiti od požara i vatrogastvu («Službene novine FBiH», broj:64/09), pa su profesionalne vatrogasne jedinice preuzete u općinske organe civilne zaštite, tako da, nakon donošenja pravilnika o unutrašnjoj organizaciji i utvrđenim radnim mjestima, proizašla je obaveza polaganja stručnog upravnog ispita.

Prema važećem Pravilniku o sadržaju i načinu polaganja stručnog ispita namještenika u organima državne službe u Federaciji BiH („Službene novine Federacije BiH“, broj 75/05) je predviđeno da kantonalna ministarstva pravosuđa odlučuju o polaganju stručnog ispita

namještenika i pripravnika srednje stručne spreme samo iz općinskih i gradskih organa državne službe, odnosno uposlenika u određenim pravnim osobama.

b) Kontinuirano je praćeno funkcioniranje sistema kantonalne uprave, naročito u pogledu analiziranja stanja ostvarivanja prava i izvršavanja obaveza građana i pravnih osoba u upravnom rješavanju iz kantonalnih organa uprave. Imajući u vidu izgrađeno stanovište da prava stranaka u upravnim postupcima nesumljivo spadaju u domen građanskih prava i obaveza predviđenih Evropskom konvencijom o ljudskim pravima, što prema zauzetom stavu Ustavnog suda BiH i Ombudsmena za Bosnu i Hercegovinu mora zadovoljiti standarde pravične i javne rasprave u razumnom roku iz člana 6. (1) navedene Konvencije. Početkom 2010. godine izrađena je Informacija o rješavanju upravnih stvari u upravnom postupku u organima uprave Tuzlanskog kantona u 2009. godini, koja je upućena Vladi na razmatranje, tako da je ista usvojena na sjednici održanoj 01.07.2010. godine.

Na temelju Poslovnika o radu Vlade Tuzlanskog kantona, davana su mišljenja o nacrtima i prijedlozima propisa u dijelu kaznenih odredaba, kao i odredaba koje se tiču organizacije kantonalne uprave, vodeći računa o ujednačavanju kaznene politike u Tuzlanskom kantonu i usuglašavanju visine novčanih kazni predviđenih ovim propisima sa Zakonom o prekršajima u Federaciji BiH.

Na zahtjev rukovodilaca kantonalnih organa državne službe, razmatrani su pravilnici o unutrašnjoj organizaciji, odnosno izmjene postojećih, sa aspekta usklađenosti sa zakonima i drugim propisima koji reguliraju pitanja obuhvaćena tim pravilnicima, ukazivano je na eventualne nedostatke, te su nakon otklanjanja istih, data pozitivna mišljenja.

Posebno je bila izražena transparentnost u radu Ministarstva i spremnost na suradnju sa nevladinim sektorom, koje su bile uključene, nerijetko i na partnerskoj osnovi, u realizaciji određenih projekata, posebno tokom javnih rasprava o nacrtima zakona ili strateških dokumenata koje je pripremio ili u čijoj je izradi sudjelovalo ovo Ministarstvo, od čega bi posebno istakli aktivnu suradnju sa Biroom za ljudska prava Tuzla i Udruženjem za zaštitu potrošača Tuzlanskog kantona..

Ostvarena je suradnja sa Federalnim ministarstvom pravde u pogledu niza upita dostavljenih ovom Ministarstvu, a koji su se odnosili na tumačenje i primjenu odredaba propisa kojima su regulirana određena pitanja u oblasti uprave. Najveći dio upita odnosio se na radno-pravni status i prava uposlenih u organima državne službe, način postavljenja rukovodećih i ostalih državnih službenika, te na tumačenje odredaba Zakona o državnoj službi u Federaciji BiH i Zakona o namještenicima u Federaciji BiH, kao i provedbenih propisa donesenih na temelju tih zakona.

Pored navedenog, ovom Ministarstvu upućena je i šest zahtjeva i za pristup informacijama, a kako su tražene informacije iz nadležnosti Ministarstva, i u svim slučajevima je doneseno rješenje kojim se u cijelosti dozvoljava pristup.

c) U 2010. godini, ukupno je zaprimljeno 96 predmeta, od toga najveći broj je predstavki na rad pojedinih općinskih službi i kantonalnih organa uprave nadležnih za rješavanje upravnih stvari u upravnom postupku.

Predmeti su se odnosili na: bespravnu gradnju, radne odnose službenika i namještenika, socijalno statusna pitanja boračko invalidske zaštite, stambena problematika, legalizacija bespravno izgrađenih građevina, neizvršavanje rješenja, imovinsko-pravni odnosi, tuđa njega i pomoć, socijalna zaštita, zaštiti civilnih žrtava rata i zaštite porodice sa djecom, dopunska pravima branitelja i članova njihovih porodica i dr.

Postupci su pokrenuti po službenoj dužnosti i riješeno je svih 96 predmeta.

U predmetima su naložene mjere za postupanje odnosno donošenje odgovarajućeg upravnog akta sa poukom o pravnom lijeku kako bi podnosioci imali mogućnost, u slučaju da budu nezadovoljni donesenim aktom, uložiti žalbu drugostepenom organu ili pokrenuti upravni spor kod nadležnog suda.

U predmetima je vršen neposredni uvid ili je u zaprimljenim predmetima, primjenjujući član 297. stav 4. Zakona o upravnom postupku («Službene novine FBiH», broj:2/98 49/98), je postupano tako što su zatražene pismene informacije od organa prema kojima su prigovori upućivani, te nakon toga su poduzimane mjere te je naloženo donošenje odgovarajućeg upravnog akta a o tome su podnosiocima prigovora obaviješteni u pismenom obliku.

Organima uprave, prema kojima su upućivani prigovori, je nalagano da postupe u skladu sa propisima koji su primjenjivani u konkretnom slučaju.

U svim zaprimljenim predmetima je postupljeno i svi predmeti su okončani. Moguće je ponovno obraćanje stranaka u postupku u slučaju nezadovoljstva u ponašanju po naloženim mjerama u postupcima.

Najveći broj predstavi je vezan za podnesene zahtjeve za legalizaciju bespravno izgrađenih građevina, bilo da službe, u čijoj je nadležnosti, ne rješavaju u zakonskim rokovima, ili iz razloga da građevinski inspektor prekida sa nadzorom nelegalne gradnje investitora onda kada investitor podnese zahtjev za legalizaciju bespravno izgrađenih objekata, pa do donošenja pravosnažnog rješenja u tom postupku.

Najveći broj obraćanja je zbog nepostupanje u zakonu predviđenom roku tj. zbog ćutanja administracije.

U takvim predmetima, organima uprave je naloženo da postupe u skladu sa odredbama Zakona o upravnom postupku u pogledu donošenja odgovarajućeg upravnog akta sa poukom o pravnom lijeku, kako bi podnosilac imao mogućnost ulaganja pravnog lijeka ili, ukoliko žalba nije dozvoljena, pokretanja kod nadležnog suda upravnog spora protiv donesenog upravnog akta u prvom stepenu.

Upravni inspektor je primao tokom cijele godine stranke koje su se usmeno obraćale radi davanja pravne pomoći iz slijedećih oblasti: bespravna gradnja radni odnosi službenika i namještenika, socijalno statusna pitanja boračko invalidske zaštite, stambena problematika, legalizacija bespravno izgrađenih građevina, neizvršavanje rješenja, imovinsko-pravni odnosi, tuđa njega i pomoć, socijalna zaštita, zaštiti civilnih žrtava rata i zaštite porodice sa djecom, dopunska pravima branitelja i članova njihovih porodica, penzijsko-invalidskog osiguranja, iz oblasti obrazovanja, te im se u okviru nadležnosti upravnog inspektora pruži odgovarajuća pravna pomoć.

Također se svakodnevno stranke obraćaju i telefonom, te je u prosjeku najmanje jedan telefonski razgovor za pružanje pomoći obavljen dnevno.

U smislu primjene odredbi Zakona o državnoj službi u Federaciji Bosne i Hercegovine, Zakona o namještenicima u organima državne službe u Federaciji Bosne i Hercegovine, Uredbe o poslovima osnovne djelatnosti iz nadležnosti organa državne službe koje obavljaju državni službenici, uvjetima za vršenje tih poslova i ostvarivanju određenih prava iz radnog odnosa i Uredbe o dopunskim pravima osnovne djelatnosti i pomoćnim djelatnostima iz nadležnosti državne službe koju obavljaju namještenici, izvršen je inspekcijski nadzor u Općinama: Teočak, Gradačac, Doboj Istok, Banovići, Kladanj, Kalesija i Lukavac.

-U općini Teočak je izvršen uvid u 30 dosijea zaposlenih državnih službenika i namještenika općine Teočak.

-U općini Gradačac je izvršen uvid u 91 dosijee zaposlenih državnih službenika i namještenika općine Gradačac.

-U općini Doboj Istok je izvršen uvid u 36 dosijea zaposlenih državnih službenika i namještenika općine Doboj Istok.

-U općini Banovići je izvršen uvid u 106 dosijea zaposlenih državnih službenika i namještenika općine Banovići.

-U općini Kladanj je izvršen uvid u 48 dosijea zaposlenih državnih službenika i namještenika općine Kladanj.

-U općini Kalesija je izvršen uvid u 76 dosijea zaposlenih državnih službenika i namještenika općine Kalesija.

-U općini Lukavac je izvršen uvid u 161 dosijee zaposlenih državnih službenika i namještenika općine Lukavac.

U navedenim općinama izvršen je nadzor u pravilnike o unutrašnjoj organizaciji općinskih službi organa državne službe shodno odredbama Zakona o organizaciji organa uprave u Federaciji Bosne i Hercegovine iz nadležnosti kantonalnog upravnog inspektora u pogledu broja zaposlenih državnih službenika i namještenika na osnovu važećeg Pravilnika o unutrašnjoj organizaciji općinskih službi organa državne službe, davanje uputa o načinu iskazivanja podataka o rješavanju upravnih stvari u upravnom postupku prema objavljenom Uputstvu, ispunjavanja uvjeta u pogledu stručne spreme za obavljanje poslova upravnog rješavanja, prijema podnesaka i postupanja po istim, pozivanje stranaka - prinudno dovođenje, pribavljanja po službenoj dužnosti podataka i činjenica o kojima se vodi službena evidencija, dostavljanja žalbi sa spisima u propisanom roku na rješavanje drugostepenom organu, donošenje rješenja u propisanom roku nakon vraćanja žalbi u ponovnom postupku, pružanje pravne pomoći građanima i pravnim licima iz svoje nadležnosti.

O izvršenom nadzoru je sačinjen zapisnik te je zapisnički ukazano na uočene nedostatke a kao preventivna mjera je ukazano kako prevazići te uočene nedostatke.

U centrima za socijalni rad općine Tuzla, Lukavac i Gračanica, također je izvršen nadzor i to u pogledu stanja rješavanja upravnih predmeta-ostvarivanje prava građana u upravnom postupku kroz primjenu pravila upravnom postupku, rješavanje predmeta u propisanim rokovima, dostavljanje žalbi na nadležno postupanje u propisanim rokovima.

Osim gore zaprimljenih predmeta, upravni inspektor je zaprimio određeni broj predmeta koji se odnosio na rad sudova čime je ostvarena suradnja upravnog inspektora i sa sudskom upravom sudova na području Tuzlanskog kantona i sa Visokim sudskim i tužilačkim vijećem Bosne i Hercegovine. Predmeti su proslijeđeni ili Visokom sudskom i tužilačkom vijeću Bosne i Hercegovine na nadležno postupanje, ako je u pitanju žalba na rad suda ili pojedinog sudije, a ako se radilo o urgenciji za postupanje po žalbi na prvostepenu odluku suda upućenu Kantonalnom sudu u Tuzli ili urgencije za postupanje općinskih sudova na području Tuzlanskog kantona, takve urgencije su dostavljane sudovima na izjašnjenje. Po urgencijama je postupljeno tako što je zatraženo od sudova da dostave izjašnjene u pogledu tražene informacije, te nakon dostavljene informacije, stranke-podnosioci urgencije su uredno obaviješteni o traženom.

Prigovori koji su upućeni ovom Ministarstvu, a tiču se primjene odredaba Zakona o državnoj službi FBiH, upravni inspektor ih je proslijeđivao Federalnom ministarstvu pravde Sarajevo na nadležno postupanje. Uglavnom su to predmeti vezani za zasnivanje radnog odnosa i rješavanju pitanja vezanih za radno pravni status, shodno navedenom Zakonu, čime je ostvarena komunikacija i sa Federalnim ministarstvom pravde Sarajevo.

Upravni inspektor je ostvario i komunikaciju sa kantonalnim pravobraniteljstvom kroz dostavljanje izjašnjenja na podnesene tužbe zaposlenih državnih službenika i namještenika a koji su zaposlenici potrošačkih jedinica iz nadležnosti Ministarstva.

U izvještajnom periodu zaprimljeno je takvih 445 predmeta upućenih na izjašnjenje od Kantonalnog pravobranilaštva TK. Uglavnom se radi o tužbama zaposlenih u organima uprave, odnosno, prevashodno u sudovima na području kantona i tužilaštvu. Dostavljani su odgovori u smislu dostavljanja podataka, spisa i obavještenja sa kojima ovo Ministarstvo raspolaže a koji su od značaja za poduzimanje pravnih radnji u pojedinim postupcima.

Također je po određenim pitanjima ostvarena suradnja sa Kantonalnom upravom za inspeksijske poslove a tiču se predmeta koji su zaprimljeni u toj upravi a nadležna je upravna inspekcija za rješavanje i obratno, kada se predmet zaprimi u ovom Ministarstvu a poslovi su iz nadležnosti inspekcije rada.

U cilju provođenja odredaba Zakona o zaštiti od nasilja u porodici, upravni inspektor je i u ovoj godini ostvario suradnju sa institucijama koji se bave problematikom vezanom za zaštitu od nasilja u porodici.

B) ODJELJENJE PRAVNIH, FINANSIJSKO-RAČUNOVODSTVENIH I OPĆIH POSLOVA

U odjeljenju pravnih, finansijsko-računovodstvenih i općih poslova, obavljali su se poslovi izrade odgovarajućih akata za godišnje planiranje i izvršavanje budžeta, izrada analiza, izvještaja i završnog računa za 2009. godinu Ministarstva pravosuđa i uprave i 10 potrošačkih jedinica koje su u nadležnosti ovog Ministarstva (Kantonalnog zavoda za pružanje pravne pomoći, Disciplinskog centra za maloljetnike, Kantonalnog suda u Tuzli, Općinskog suda u Tuzli, Općinskog suda u Živinicama, Općinskog suda u Gradačcu, Općinskog suda u Gračanici, Općinskog suda u Kalesiji, Kantonalnog tužilaštva Tuzla i Kantonalnog pravobranilaštva Tuzla).

U odjeljenju egzistira i trezorska stanica u kojoj se vrši unos podataka materijalno-finansijske dokumentacije za pravosudne institucije na području Tuzlanskog kantona, unos i obrada narudžbenica, faktura, kontrola pravilnog utroška sredstava i nadzor nad finansijskim radom korisnika. Vršena je kontrola donesenih podzakonskih akata i provedenih procedura nabavke roba i usluga Ministarstva i korisnika u nadležnosti ovog Ministarstva.

Odluke i Zaključci Vlade, kao i provedbeni propisi Ministarstva finansija, koji su bili vezani za finansijsko računovodstveno i materijalno poslovanje pravosudnih organa, blagovremeno su dostavljani korisnicima na uvid i postupanja u skladu sa istim. Tokom izvještajnog perioda pružana je stručna pomoć korisnicima u djelokrugu ovog Ministarstva, odgovori, mišljenja i objašnjenja na upite u primjeni propisa iz oblasti računovodstva i javnih nabavki.

U izvještajnom periodu Ministarstvo je imalo na raspolaganju 1.212.411,16 KM. Od ukupnog iznosa na budžetska sredstva odnosilo se 1.177.775,00 KM i 34.636,16 KM ostvarenih vlastitih prihoda. Od odobrenih sredstava, za plaće i naknade troškova zaposlenih planirano je 446.758,00 KM ili 36,8 % ukupnih sredstava, izdake za materijal i usluge 103.413,16 KM ili 8,5%, tekuće grantove, 644.600,00 ili 53,2% i kapitalne izdatke 17.640,00 KM ili 1,5%. Tekući grantovi koji obuhvataju 53,2% raspoloživih sredstava, odnosili su se na obaveze prema Federalnom ministarstvu pravde za naknadu troškova izvršenja mjera pritvora osobama kojima su nadležni sudovi kantona izrekli ovu mjeru, a nalaze se na izdržavanje iste u Kazneno popravnom zavodu poluotvorenog tipa u Tuzli. Naknadu troškova boravka pritvorenika u iznosi od 30,00 KM po danu boravka snosi ovo Ministarstvo.

Troškovi poslovanja u 2010. godini iznosili su 1.182.230,29 KM ili 97,50 % u odnosu na raspoloživa sredstva. Struktura troškova data je u sljedećem tabelarnom prikazu:

naziv	Budžet 2010.	izvršenje	indeks
Plaće i troškovi zaposlenih	446.758,00	445.930,85	99,8
Materijalni troškovi	103.413,16	84.494,44	81,7
Tekući transferi	644.600,00	643.920,00	99,9
Kapitalni izdaci	17.640,00	7.885,00	44,7
Ukupno:	1.212.411,16	1.182.230,29	97,5

Obavljanje stručnih poslova odnosilo se na, izradu mjesečnih finansijskih planova, izradu metodologije i praćenje izvršenja budžeta, poduzimanje potrebnih aktivnosti na obezbjeđenju nedostajućih sredstva za redovno poslovanje korisnika putem izmjena dinamike operativnih planova i unutrašnju preraspodjele izdataka. Izrada operativnih planova izvršenja budžeta vršila se kvartalno na osnovu Instrukcija Ministarstva finansija i zahtjeva korisnika. Zahtjevi korisnika. u odjeljenju su se analizirali, konsolidovali i zbirni podaci dostavljali Ministarstvu finansija na unos (44 operativna plana). U izvještajnom periodu obrađeno je 19 zahtjeva korisnika za izmjenu dinamike operativnog plana i 10 zahtjeva za unutrašnju preraspodjelu rashoda.

Urađen je Elaborat o izvršenom popisu sredstava i izvora sredstava osam potrošačkih jedinica u nadležnosti Ministarstva sa stanjem na dan 31.12.2009. godine.

Obezbijedena su sredstva iz budžeta za kapitalne izdatke za pet potrošačkih jedinica u iznosu od 43.700,00 KM, od toga 19.700,00 KM za nabavku namještaja, 9.000,00 KM za nabavku kompjuterske opreme i 15.000,00 KM za rekonstrukciju objekata.

Obezbijedena sredstva u iznosu od 100.000,00 KM sa budžetske pozicije “Sredstva za utrošak prihoda od koncesija”, Kantonalnom tužilaštvu Tuzlanskog kantona za izvođenje potrebnih radova u određenim fazama na objektu u izgradnji.

Vladi Tuzlanskog kantona dostavljeno je 13 zahtjeva za izdavanje saglasnost za provođenje procedura za prijem 23 uposlenika na upražnjena radna mjesta (12 uposlenika na određeno vrijeme i 11 uposlenika za rad na neodređeno radno vrijeme). Prijem uposlenika na određeno vrijeme vezan je za rad sa dodatnim sudijama u Kantonalnom sudu u Tuzli, Općinskom sudu u Tuzli, Općinskom sudu u Živinicama i zamjenu odsutnog uposlenika zbog dužeg bolovanja u Kantonalnom tužilaštvu.

Naziv potrošačke jedinice	Broj uposlenika
Ministarstvo pravosuđa i uprave	1
Kantonalni sud u Tuzli	6
Općinski sud u Tuzli	7
Općinski sud u Živinicama	2
Općinski sud u Gradačcu	1
Općinski sud u Kalesiji	2
Kantonalno tužilaštvo	4
ukupno	23

Izdate su 3 garancija sudovima da su obezbijedena sredstava za plaće i naknade u budžetu za 2010. godinu za (3) sudija ito: produženje manadata (1) dodatnog sudije u Kantonalnom sudu u Tuzli, imenovanje (1) dodatnog sudiju u Općinskom sudu u Tuzli i imenovanje (1) dodatnog sudije u Općinskom sudu u Gradačcu za zamjenu sudije koji je duže vrijeme bio na bolovanju.

Dobivena je saglasnost Vlade Tuzlanskog kantona za prijem 26 diplomiranih pravnika u svojstvu pripravnika-volontera i to: Kantonalnom sudu u Tuzli (3), Općinskom sudu u Tuzli (10), Općinskom sudu u Živinicama (2), Općinskom sudu u Gradačcu (2), Općinskom sudu u Gračanici (2), Općinskom sudu u Kalesiji (2) i Kantonalnom tužilaštvu u Tuzli (5)

U izještajnom periodu dostavljena informacija Instituciji ombudsmena za ljudska prava Bosne i Hercegovine, vezano je za nedostatak potrebnog broja administrativnih radnika u Općinskom sudu u Tuzli.

Organizovano nekoliko sastanaka sa rukovodiocima pravosudnih institucija, predstavnicima VSTV-a, a vezano za rješavanje tekućih problema i konsultacije za izradu budžeta za 2011. godinu.

Poduzete su potrebne aktivnosti oko izrade Zahtjeva za finansiranje u 2011. godini za Ministarstvo pravosuđa i uprave i budžetske korisnike pri ministarstvu. Priprema i izrada budžeta predstavlja značajnu odgovornost, budući da sudački i tužilački sistem mogu djelotvorno funkcionisati samo ukoliko su na odgovarajući način finansirani, pri čemu je važno da procesi putem kojih se vrši ta mjerodavnost ne ugroze neovisnost pravosuđa. Isto tako važno je da budžeti budu dobro promišljeni, da se svaka budžetska stavka može dokumentovati i podkrijepiti dokazima.

Obzirom na trenutnu finansijsku situaciju i nedostatak sredstava u budžetima, Ministarstvo je imalo dovoljno sredstava i zadovoljavajuće prostorne kapacitete, te su se zadani poslovi obavljali uz racionalno korištenje raspoloživih sredstava i realizovani su zahvaljujući savjesnim i odgovornim radom svih uposlenika.

Bosna i Hercegovina
Federacija Bosne i Hercegovine
TUZLANSKI KANTON
Ministarstvo pravosuđa i uprave

Broj: 06/1-_____/11
Tuzla, _____ . god.

MINISTRICA

Jasminka Mijatović

